

1 YOHANES

Yohanes Eto Kukue Tutɛ

Onanto Eto Nkpə Eto Ditiki Ni Yesu Kristo.

¹ Bɔɛ kukue komfo bɔwɔni kɛtɛ mi, ko nyɛ lɛ Nkpɛ eto ditiki nɛ nsi nkpɛ itsyi ta kawunsia eto ketsyikokɔ ke ɛsuɛ. Bɔnɔ etiki itsyi lɛ ni ɛsuɛ nya bɔkɛnyɛ ni ku bo ɛnɛmi tsya. Sitinti ini bɛ bɔnyɛ ni ku bo ɛnɛmi nya bɔkɛtidi ni ku bo ani tsya. ² Se Onanto dɔlɛkɛ ditiki nɛ lɛtɛtɛ nkpɛ le lekpelee, bɔnyɛ wɛ nya bɔdi etiki itsyi lɛ wɛ ɛsuɛ. Bɔbɛ letsya lɛ nkpɛ manlo bo nkpɛ lɛ wɛ, nya onkpɛ lɛ Anto Onanto ɛmɛ ɔflɔ. Nya Onanto dɔlɛkɛ wɛ ɔtɛ bo tsya. ³ Lesa nɛ bɔkɛnyɛ nya bɔnɔɔ, ni bɔnlɛ letsya bobɛ kɛtɛ mi nɛ, bɛ lɛ mi tsya lɛ bibɛ bɛkɔ ku bo lɛ lɔniyifoyifo nɛ ɛsuɛ bonkpɛ ku Anto ɛmɛ ku wɛ ubi Yesu Kristo. ⁴ Nyaso bɔnlɛ kukue komfo bɔwɔni kɛtɛ mi, bɛ disuɛyuɛ nɛ bɔnlɛ bunyɛ, lɛ lɛflɔ lelo.

Onanto Ni Diyɛnde.

⁵ Mɔmɔɔ, ditiki nɛ bɔnɔ butsyiko lɛ wɛ Ubi ɛmɛ ɔflɔ nya bɔfi ni bɔnlɛ letsya bobɛ kɛtɛ mi ni nkɛ Onanto ni diyɛnde, nya ketuntu saa lɛmbɛ lɛ wɛ. ⁶ Nyaso lɛ bɔɛ bɔtɛyi boɛ buyifo bani ku wɛ, fɛ busi bunsɛ nkpɛ lɛ ketuntu ɛsuɛ, nyalɛ bɔɛ sɔdia bɔtɛyi lɛ bo etiki ku lɛ bo eyifosa ɛsuɛ. ⁷ Fɛɛ lɛ busi nkpɛ lɛ diyɛnde ɛsuɛ fɛ kase unsi lɛ diyɛnde ɛsuɛ, nyalɛ etɛ bɛ busi lɛ lɔniyifoyifo ɛsuɛ ku bo bayimitsyuɛ. Nya Yesu Kristo wɛ ni

wə Ubi eto kɔtɔ əflə lehua saa lehua lə bo əsuə kúwi.

⁸ Lə bótɛyi boə lehua saa əmbə lə bo əsuə, bówɛ əsuə nya bɔnnlɛ ɔnukuale bótɛyi. ⁹ Fɛɛ lə buləkə bo abua kasɔ butə Onantoo, wɔɔyɛ lə wə kɛnyɛtsyətsyə əsuə uyifo lesa nə lɛlɛkɛ utə bo, wuufi bo abua ɔtsyɛ bo, uflə nnya uwui lə bo. ¹⁰ Fɛɛ lə bɔni boə lehua saa mbə bo lə əsuəə, nyalɛ bútəkə Onanto sidia, nya wə ditiki əmbə lə bo əsuə.

2

Yesu Kristo Eyifo Bo Ɔwunsəkotsyua.

¹ Mɔ bebi lala, nɛ nyamfo bɔwɔni katsyese mi bə lə bienyifo lehua. Fɛɛ lə utsyuə éyifo lehuaa, bokpɛ utsyuə wə ləənyə lə bo kɛnyɛ kalɛ Onanto lekpa kətə bo. Wə ni Yesu Kristo wə ni ɔsɛɛ əmə. ² Nya Kristo kosate ni nwə əsuə Onanto laayɛ kefi bo abua katsyɛ bo. Inni bo mate eto ale ete woefi katsyɛ, bomu kawunsia kenke eto betidi eto ale.

³ Lə butsyue Onanto eto afi kotoo, eté bə buyi wə. ⁴ Lə utsyuə lə bótɛyi nkə, “Nyi wə,” fɛɛ woenyifo lə wə afi əsuəə, utsyuə əmfo eyifo odia. Nya ɔnukuale saa əmbə lə wə. ⁵ Fɛɛ utsyuə saa ke leetsyue wə ditiki koto, wə lelabi itə Onanto ni nə lɛflɔ nɛ. Bitə lə ntɛyi mi kase boate boə buyifo bani ku Onanto nya ni benkə, ⁶ utsyuə saa ke laatɛyi nkə uyifo ɔni ku Onanto, ele bə usia nkpə fe kase Yesu Kristo dísiə.

Ele Bə Sia Nkpe Lə Diyənde Ɔsuə.

⁷ Mɔ balala, nnya minle bɔwɔni katsyese mi enni kɔfi fɔfɔ. Bomu kɔfi koko ko nte taa kasɔ ketsyikokɔ ke. Kɔfi koko komfo eyifo nko fákano taa kɔ. ⁸ Fɛɛ kɔfi ko minle bɔwɔni kɛtɛ mi mfoo, lɛ sitinti kuyifo kɔfɔfɔ itsyise ko ɔnukuale ye lɛ Kristo ku mi tsya ɛsuɛ. Itsyise ketuntu kamɛ lɛ bofe nya diyɛnde nɛmɛ kosate fe lɛlɛ buyɛnde.

⁹ Nya utsyuɛ saa ke laateyi nkɛ okpɛ lɛ diyɛnde nɛmɛ ɛsuɛ fɛ weekisi wɛ ɔyimitsyuɛ, si okpɛ lɛ ketuntu ɛsuɛ ibɛ ese mɔmɔ. ¹⁰ Nya utsyuɛ saa ke laala wɛ ɔyimitsyuɛ, kpɛ lɛ diyɛnde ɛsuɛ, nya kulesa ɛmbɛ lɛ wɛ nɛ luutɛ bɛ utsyuɛ bamba dufɛ lɛ lebua ɛsuɛ. ¹¹ Fɛɛ utsyuɛ saa wɛ leekisi wɛ ɔyimitsyuɛ, kpɛ lɛ ketuntu ɛsuɛ, nya ɔnye lɛ ke kɛmiɛ. Nya unyi kaka ɔntɔ, itsyise ketuntu kamɛ ɛtɛ ɔba ɛnɛmi.

¹² Mɔ bebi lala, nle kukue komfo bɔwɔni kɛtɛ mi lɛ bete biɛ eyɛ lɛ Kristo ɛsuɛ, Onanto ɛfi mi abua ɔtsyɛ mi.

¹³ Antomɛ, mi minle kukue komfo bɔwɔni kɛtɛ nɛ itsyise biyi Kristo wɛ nsi nkpɛ taa kasɔ ketsyikokɔ ɛmɛ.

Nya nko ɛmɛ ke minle bɔwɔni kɛtɛ mi bakosobi nɛ itsyise bítɛkɛ Obuale ɛmɛ tsya kato.

¹⁴ Nya mi, mɔ bebi lala, nle mi kukue komfo bɔwɔni itsyise biyi Anto ɛmɛ.

Mi antomɛ, mi minle kukue komfo bɔwɔni kɛtɛ itsyise biyi Kristo wɛ nsi nkpɛ taa kasɔ ketsyikokɔ ɛmɛ.

Nya mi bakosobi, nle kukue komfo bɔwɔni kɛtɛ itsyise bekpɛ ɛsuɛale,

nya Onanto eto ditiki nāmə nsi nkpə lə mi
nya bíkətəkə Obuale əmə kato.

¹⁵ Biemfi lelabi bitə kawunsiə kamfo nye kulesa nə nkpe lə ke, itsyise utsyuə saa ke laala kawunsiə kamfoo, anla Anto əmə. ¹⁶ Lesa saa nə ni kawunsiə kamfo eto lele ni fe asa bua nnya laale utidi ɔkɔɛ, asa bua nnya betidi lənyə nya nnya ake mə ɔkɔɛ ku lesa saa nə nkpe lə kawunsiə nə əsuə utidi laabesə əsuə kato, nyamfo eto kuditsyuə mentsyi Anto əmə fl. Bomu nyamble etsyi kawunsiə mfo. ¹⁷ Kawunsiə kamfo ku kə asa nnya laale utidi ɔkɔɛɛ, əbə ɛɛ bofe. Fɛɛ nwə leeyifo lə Onanto eto lelabi əsuə, ebusiə nkpə lefe saa.

Mimble Kenke Yi Onanto Eto Ditiki Nəmə Kosate.

¹⁸ Mɔ bebi lala, kawunsiə kamfo eto kalosəkɔ eboyo kalo! Nya fe kase bátəyi mii, bíɔɔ biə Kristo eto olo əmə ébubə, nya mómɔɔ, Kristo eto balo kpə ébubə bakpe. Nyaso buyi boə kawunsiə eto kalosəkɔ ebɔfi. ¹⁹ Lə sitintii, betidi bamfo əmbə lə bo ditsyukpa nəmfo əsuə, nyaso bábɔ bo lə nti nɛ. Lə bo betidi kosate benii, eni besi bakpé lə bo nti. Fɛɛ mə budu lə bo nti ɛ bote nkə mə nti eto kuutsyuə menyifo bo ole.

²⁰ Fɛ mii, Kristo éfi Lɛwɔɔ Kenke nāmə ókpé mi lə əsuə, nya mible kenke nyi ɔnukuale eto ditiki nāmə. ²¹ Inni lə kase binnyi ɔnukuale əmə eso minlə Ditiki Sɛɛ nəmfo bɔwɔni katsyese mi, bomu se binyi ni eso. Nya binyi tsya biə sidia saa eni Ditiki Sɛɛ nāmə.

²² Nya owoe ni odia əmə? Odia əmə ni nwə leni nkə Yesu eni Nwə Onanto Lékpɔ Ǿhile Utsyə.

Utidi əmfo eto okle tututu ni Kristo eto olo nɛ. Nya wə ni nwə leni Onanto ku wə Ubi əmə nɛ. ²³ Itsyise nwə ke leni Ubi əmfo áni Anto əmə tsya. Nwə ke léfo Ubi əmə ɔ́nɔɔ, áfo Anto əmə tsya.

²⁴ Bebe kukɔ́nɔ biə ditiki nə béfo idu taa kasɔ ketsyikokɔ eyo mɔ́mɔɔ, edufə mi læ akɔ́ɛsi kenke. Nya læ bɛlɛ nnya kukɔ́nɔɔ, nyalɛ biusiə nkpə læ Ubi əmə ku Anto əmə eto lɔ́niyifoyifo əsuə lefe saa. ²⁵ Nya nkpə manlo bomfo ni kɛnyɛ ka Kristo dítsyɛ nkə wuufi utə bo nɛ.

²⁶ Nlɛ nyamfo bɔ́wɔ́ni kətə mi itsyi læ betidi ba loola bə baawɛ mi bakpé eso. ²⁷ Fɛ mimii, Kristo eto Lɛwɔ́nɔ nə ókpo læ mi əsuəə, áfo disia læ mi əsuə kenke. Lə nyasoo, yensife bə kuutsyuə saa læ usi ote mi kulesa bio. Itsyise wə Lɛwɔ́nɔ nəmə aate mi lesa saa. Nya asa nnya diate eyifo ɔ́nukualɛ nya sidia saa læmbə nnya əsuə. Nyaso bitsyue koto lesa nə Lɛwɔ́nɔ nəmə léte mi læ bisia læ lɔ́niyifoyifo ku Kristo əsuə.

²⁸ Nko ini nɛ, mɔ́ bebi lala, biyifo lɔ́ni ku Kristo bə læ lefe nə ɔ́ɔbɔ ubəə, biofo bɔ́bɔ kənyə læ wə ənəmi ku utu wuee kofanimante læ Diyi nəmə əsuə. ²⁹ Lə biyi biə Kristo eyifo ɔ́sɛɛ, ele bə befo bɛnɔ biə utsyuə saa wə leeyifo asa læ kusu sɛɛ əsuə, eyifo Onanto eto ubi.

3

Buyifo Onanto Eto Bebi.

¹ Bebe kase sɔ́ɔ́ Anto Onanto laala bomba léfo Yesu bɔ́nɔɔ. Nyaso waakpadi bo nkə wə bebi nɛ. Nya boyifo Onanto eto bebi sitinti. Nnya eso kawunsia eto betidi lenyi bo ni bənkə, benyi Onanto. ² Mɔ́ bayimi lala, mɔ́mɔɔ, buyifo Onanto

eto bebi. Fɛɛ betidi ba eto okle buubə bofiani, Onanto mənłəkə óte bo tɔ. Fɛɛ buyi buə lefe nə Kristo luubəə, buutsyə fe wə ke seka. Itsyise buunyə wə fe kase unte sitinti. ³ Nya utsyuə saa ke nkpe kusubebe komfo lə Kristo əsuəə, aalɔ wə əsuə kətsyəsə kənke fe kase Kristo tsya diyifo kənke.

⁴ Utsyuə saa ke leeyifo lebua, aata Onanto eto kɔfi kebu. Itsyise lebua eyifo Onanto eto kɔfi bota kebu. ⁵ Nya biyi biə bubə Kristo díbə nkə lə uləkə bo utsyiko lə lebuayifoyifo əsuə. Nya wəə, lebua saa əmbə lə wə əsuə. ⁶ Nyaso utsyuə saa ke nsi nkpe lə Kristo əsuəə, ənsiə nkpe keyifo lebua. Fɛɛ utsyuə saa ke ləəsiə nkpe keyifo lebua, lə bote nkə wənnə tɔ Kristo, nya taa mɔmɔ kulaa tsya wante wə tɔ.

⁷ Mɔ bebi lalaa, biəntə lə kuutsyuə saa lə ɔwɛ mi okpé. Utsyuə saa ke leeyifo asa lə kusu sɛɛ əsuəə, wə ni ɔsɛɛ fe kase Kristo diyifo ɔsɛɛ nɛ. ⁸ Utsyuə saa ke nsi nkpe lə lebua əsuəə, eyifo Obonsam eto ole. Itsyise Obonsam éyifo lebua taa kasɔ ketsyikokɔ kamə ke. Nyamfo eso Onanto eto Ubi díbə kawunsiə nɛ nkə lə obiasə Obonsam eto eyifosa bua nyamə.

⁹ Utsyuə saa ke ni Onanto eto ubii, ənsiə nkpe keyifo lebua. Itsyise Onanto eto ditsyəbi kpé lə wə. Wəambofo busiə keyifo lebua se Onanto ni wə Anto eso. ¹⁰ Letekɛkɛ nə nkpe lə Onanto eto bebi ku Obonsam eto bebi nti ni bə, utsyuə saa wə ke leenyifo kasɛɛ nye waanla wə ɔyimitsyuəə, eni Onanto eto ubi.

Bela Bətsyuə.

¹¹ Kenye ka beno taa kaso ketsyikoko ni benkə, ele bə bola bətsyua. ¹² Yanle bə butsyə fe Kain, nwə didi Obonsam eto ubi, nya ólo wə oyimisani. Nya beso Kain lelo wə? Ólo wə itsyise wə Kain eto eyifosa mánye læ kusu sɛɛ əsuə nya wə oyimisani eto eyifosa áye læ kusu sɛɛ əsuə eso.

¹³ Nyaso, mo bayimi, yenyifo mi naa læ kawunsiə eto betidi ekisi mi. ¹⁴ Buyi boə bóbo læ ukpe kəmiə bubə busi læ nkpə əsuə. Buyi nko itsyise boala bo bayimitsyua. Utsyua saa wə laanla wə oyimitsyua si nkpə læ ukpe eto əsuəale kəmiə. ¹⁵ Utsyua saa ke leekisi wə oyimitsyua, uyifo uwudifo. Nya mi kosate yi biə uwudifo saa əmbə nkpə manlo læ wə.

¹⁶ Eyɛ læ nyamfo əsuəə, nya bunyi lesa nə ni lelabi nɛ, nya nnya ni bə Kristo éfi wə nkpə útə læ bo disi. Nyaso ele bə bo tsya fi bo nkpə butə læ bo bayimitsyua eto disi. ¹⁷ Lə utsyua wə nkpe kənikalende ənyə nkə lesa ahiã wə oyimitsyua fe wánwunsəko wə bomu útsyi kama ókpé wəə, ntsyə wofo bətəyi nkə woala Onanto? ¹⁸ Mo bebi lala, biəntə læ buləkə lelabi bote læ kenye fufu eto etiki əsuə ete. Bomu bitə læ eyɛ læ bətsyua bəwunsəko læ sitinti əsuə. ¹⁹ Eyɛ læ nyamfo əsuəə, boote boə buyifo onukuale əmə eto bale, nya buunyə kənyəkə læ Onanto eto ənəmi. ²⁰ Lə bo akəesi alo bo dikpi kulaa tsyaa, buyi boə Onanto amə oso bo akəesi, nya unyi lesa saa.

²¹ Nyaso, mo bayimi lala, læ bo akəesi manlo bo dikpii, bokpe kənyəkə ku nkəale læ Onanto eto ənəmi. ²² Boafo lesa nə boatə ketsyiko læ wə oflo itsyise boetsyue wə afi nyamə koto nya

boeyifo læ wə lelabi əsuə. ²³ Kɔfi ko ókpe bo ni nkə bofo wə ubi Yesu Kristo bɔnɔ læ bola bətsyuə fe kase Kristo letɔ utsyiko bo ɔflo. ²⁴ Utsyuə saa ke leetsyue Onanto eto kɔfi koto əsiə nkrə læ lɔniyifoyifo əsuə ku Onanto, nya Onanto tsya læəsiəko wə. Nya læ Lɛwɔnɔ nə Onanto dífi útə bo esoo, buyi boə Onanto si ko bo.

4

Beto Lɛwɔnɔ Saa Bebe.

¹ Mɔ bayimi lala, biamfo utsyuə saa wə laatɛyi nkə Onanto eto Lɛwɔnɔ si læ wə bɛnɔ. Bomu beto mə bebe læ bete læ lɛwɔnɔ nəmə etsyi Onanto ɔflo. Itsyise bidia, bidia eto bənyeləkətidi éboba bákpo læ kawunsiə eto kalebe saa. ² Nya kase fɔɔyɛ ate læ lɛwɔnɔ nəmə etsyi Onanto ɔflo ni bæ utsyuə saa laatɛyi nkə Yesu Kristo əbə kawunsiə fe utidinini, kpé Lɛwɔnɔ nə ditsyi Onanto ɔflo. ³ Fɛɛ utsyuə saa ke dímamfo ónɔ nkə Yesu əbə kawunsiə kamfo fe utidininii, eto lɛwɔnɔ mentsyi Onanto ɔflo. Lɛwɔnɔ nə nkpe wə læ əsuə eyifo Kristo eto olo eto lɛwɔnɔ. Bɛnɔ biə lɛwɔnɔ nəmə ebubə. Nya mɔmɔɔ, díubə lekpe læ kawunsiə mfo koko.

⁴ Fɛɛ, mɔ bebi lala, biyifo Onanto eto bale nya bítəkə bidiabidia eto bənyeləkətidi kato itsyise Lɛwɔnɔ Kɛnkɛ nə nkpe læ mii, kpé kɛnyɛale leso mba ni kawunsiə mfo eto betidi eto lɛwɔnɔ. ⁵ Se ini kawunsiə mfo betsyi esoo, kawunsiə mfo eto asa əsuə ete beedi etiki ketsyiko, nya mba ditsyi kawunsiə mfo leetsyue mə koto. ⁶ Fɛ boo, Onanto eto bale buni. Utsyuə saa wə nyi Onantoo, eetsyue bo ditiki koto, nya nwə ke leni Onanto

eto olee, entsyue bo koto. Nyamfo ni kase boənyə kətsyə lekpo, Ləwɔnɔ nə ni ɔnukualɛ eto lele ku nə ni bidiabidia eto lele.

Nyamfo Ləələkə Onanto Eto Lelabi Kate Nɛ.

⁷ Mɔ bayimi lala, bitə lə bola bətsyuə. Itsyise lelabi etsyi Onanto ɔflo. Nya utsyuə saa wə laala utidii, eyifo Onanto eto ubi, nya unyi Onanto tsya. ⁸ Nya utsyuə saa ke laanla betidii, enyi Onanto. Itsyise Onanto eyifo lelabi. ⁹ Kusu ko Onanto lɛyɛ úləkə wə lelabi ote bo ni bə ótsyese wə Ubi lala ɔni əmə kplo lə kawunsiə, bə eyɛ lə wə əsuəə, lə bunyə nkpə manlo. ¹⁰ Eyɛ lə nyamfo əsuəə, nya bóte lesa nə ko ni lelabi nɛ. Inni lə kase boala Onanto bomu bə waala bo nya ótsyese wə Ubi nkə lə eyɛ wə əsuəə, lə ufi bo abua batsyɛ bo.

¹¹ Bayimi lala, lə mmə ni kase Onanto léla boo, nyalɛ ele bə bola bo bətsyuə. ¹² Kuutsyuə mənɔyə tɔ Onanto unyə. Fɛɛ lə boala bətsyuəə, Onanto eyifo ɔni ku bo, nya ɔflɔsə wə lelabi lə bo əsuə.

¹³ Buyi sitinti boə bokpé lə Onanto əsuə nya wuutsya nkpe lə bo, itsyise úfi wə Ləwɔnɔ útə bo. ¹⁴ Búnɔyə nya búfi nnya bóbe letsya butə bətidi bamba boə Onanto átsyese wə Ubi nkə lə ubə ofiani Ofomfokətə itə kawunsiə kenke. ¹⁵ Lə utsyuə ələkə ote nkə Yesu eyifo Onanto eto Ubii, ete bə Onanto kpé wə əsuə nya wuutsya nkpe lə Onanto əsuə. ¹⁶ Nya bunyi nya bófo lelabi nə Onanto dífi útə bo bóɔɔ. Onanto eyifo lelabi, nya nwə nsi nkpə lə lelabi əsuəə, si nkpə lə lɔniyifoyifo əsuə ku Onanto nya Onanto tsya nsi nkpə lə lɔniyifoyifo əsuə ku bo. ¹⁷ Nyamfo

eso ele bæ lelabi flɔ læ bofo əsuə, bæ læ bofo buɲyə kekleke læ Lekpoyi Fɛfɛ nəmə əsuə, itsyise bo nkpəsiəsiə læ kawunsiə mfo akateko Kristo eto nle. ¹⁸ Sikpitete saa əmbə læ lelabi əsuə. Bomu lelabi nə læflɔ aala sikpitete katsyese kama. Nyaso nwə laate asa sikpi eto lelabi mamflɔ lelo, itsyise sikpitete ku kotonənə ayenko bətsyuə.

¹⁹ Boala Onanto itsyise wə leka bo bola. ²⁰ Lə utsyuə aatɛyi nkə waala Onanto fɛ weekisi wə ɔyimitsyuə, odia uni. Itsyise utsyuə saa wə laanla wə ɔyimitsyuə wə wəənyə ku ənəmi, ntsyə woofɔ Onanto wə wəənnɲə ku ənəmi bola? ²¹ Kofi ko Kristo dítə bo ni nkə, utsyuə saa ke laala Onanto, ele bæ ola wə ɔyimitsyuə tsya.

5

Bo Bofokanɔ Ɔtəkə Kawunsiə Kato.

¹ Betidi ba kenke lefo banɔ bæ Yesu ni Nwə Onanto Lékpɔ Ɔhile Utsyəə, eyifo Onanto eto bebi. Nya utsyuə saa ke laala antoo, ala wə ubi tsya. ² Nyaso læ boala Onanto nya boeyifo læ wə afi əsuəə, eté bo boə boala Onanto eto bebi tsya. ³ Lə buyifo læ Onanto eto afi əsuəə, ete bæ boala wə. Onanto eto afi əsuə buyifoo, enni lesa nə nso ale bɔkɛ. ⁴ Itsyise utsyuə saa wə ni Onanto eto ubi, ətəkə kawunsiə kamfo kato. Nya boafɔ nyamfo buyifo eyɛ læ bofokanɔ əsuə. ⁵ Nya owoe lofo kawunsiə kato butəkə? Nwə hã te léfo ɔnɔ nkə Yesu ni Onanto eto ubi.

Adansiɛdidi Lə Yesu Ɔsuə.

⁶ Yesu Kristo ni utidi wə díbə kawunsiə læ ntu ku kɔtɔ əsuə, nya ntu eyɛ læ ntuflesəfləsə eto lekpa əsuə ku kɔtɔ eyɛ læ wə ukpe əsuə. Wəəmbə

læ ntu mate æsuæ, bomu læ ntu ku kɔtɔ æsuæ. Nya Lɛwɔnɔ Kenke kosate læ adansie budi kate nkæ nyamfo eyifo sitinti, itsyise Lɛwɔnɔ nɛmæ eyifo ɔnukuale. ⁷ Badansie itsyæ nkpe. ⁸ Mæ ni Lɛwɔnɔ nɛmæ, ntu bomæ ku kɔtɔ komæ. Nya mæ itsyæ bamæ læ adansie ani budi. ⁹ Bofu utidi eto adansie bɔnɔ, fɛɛ Onanto eto adansie kpé kɛnyɛale kaso, nya wæ dídi adansie nyamfo itsyi læ wæ Ubi æsuæ. ¹⁰ Nyaso utidi wæ ke lefu Onanto eto Ubi ɔnɔ, waafu asa nnya Onanto letɛyi itsyi læ wæ Ubi æsuæ ɔnɔ. Fɛɛ utidi wæ ke dímamfo Onanto ɔnɔ, ænyæ Onanto fe odia etsyise wámfo sedansie sia údi læ wæ Ubi æsuæ ɔnɔ. ¹¹ Nnya ɔtɛyi ni nkæ, útæ bo nkpe bo læmbæ kalosæko ɛyɛ læ wæ Ubi æsuæ. ¹² Utsyuæ saa wæ léfu Onanto eto Ubi ɔnɔ, nkpe bomfo éboka mi kɔni nkoko. Fɛɛ utsyuæ saa wæ dímamfo Ubi æmæ ɔnɔ, embæ nkpe bomfo.

Akpe Nkpe Bo Lembolo Kulefe.

¹³ Nlɛ kukue komfo bɔwɔnɔ kætæ mimba léfu Onanto eto Ubi æmæ bɛnɔ læ betɛ biæ nkpe manlo éboka mi kɔni. ¹⁴ Boakpé utu, kefi ænæ kætækæ læ Onantoo æsuæ boæ læ bɔtɔ wæ lesaatsyuæ ɛyɛ læ wæ lelabi æsuæ, woanɔ nnya. ¹⁵ Waanɔ lefe næ ke bɔtɔ wæ asa, nya se bunyi nko esoo, buyi tsya boæ wætæ bo lesa næ bɔtɔ wæ.

¹⁶ Læ utsyuæ ænyæ wæ ɔyimitsyuæ ɔnlɛ lebuæ ditsyuæ næ lænnæ ukpe kaboko buyifoo, ele bæ oto ola utæ Onanto wæ luutæ wæ nkpe. Mba leeyifo lebuæ næ lænnæ ukpe kaboko eto etiki ni nyamfo nɛ. Fɛɛ lebuæ ditsyuæ kpe næ lænnæ ukpe kaboko. Inni lebuæ nɛmfu eto okle eto disi minlɛ miæ bato ola. ¹⁷ Lesa saa næ lanyɛ læ kusu

əsua buyifo eyifo lehua, fεε abua ətsyuə kpé nya lænnə utidi kakpe læ ukpe əsuə.

¹⁸ Buyi boə utsyuə saa ke ni Onanto eto ubii, enyifo lehua, itsyise Onanto eto Ubi əmə aabe wə, nya obuəle əmə amfo wə kabua saa buyifo.

¹⁹ Buyi boə Onanto eto bale buni, fεε kawunsie kenke kpé læ obuəle əmə eto əsuəale kalɔ. ²⁰ Buyi boə Onanto eto Ubi əbə, nya útə bónɔ asa kasɔ nya læ bote Onanto tinti əmə. Busi nkpə læ lɔniyifoyifo ku wə ni sitinti ku wə Ubi Yesu Kristo. Nwəmfɔ ni Onanto tinti əmə, lætə bo nkpə manlo nε.

²¹ Nyaso, mɔ bebi lala, biləkə mi əsuə bitsyiko læ bæfiə eto keditətə əsuə.

**Onanto eto kakle fɔfɔ; Sɛkpɛle
Sekpele: Onanto eto kakle fɔfɔ; Sɛkpɛle New
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 13 Jul 2022

5fc03d2a-3cf8-5607-a6e0-9e1e197140bd